

四庫全書

子部

欽定四庫全書

子部

書畫彙考卷

三十九
四十

詳校官中書臣沈 颺

侍讀臣孫球覆勘

總校官進士臣朱 鈐

校對官主事臣陳文振

謄錄監生臣任銜萱

欽定四庫全書

書畫彙考卷三十九

刑部左侍郎卞永譽撰

畫九

唐

王維

王右丞弈棋圖卷

摩詰弈棋圖

絹本 李西涯篆書五大字引首鈐縫有政和宣和二方印

摩詰本詩人精思詣元化緒餘臻畫妙遂方吳子
駕寫成三士奕棋圖意態蕭然各閒暇儒冠羽服
對紋楸老僧傍晚誠可詫形如槁木心死灰豈識
枰中有機獲抑亦至人聊自適肯效澆風生變詐
歷唐默計五百年一著指間猶未下樵丁不獨爛
斧柯閱世紛爭幾王霸乃知非人看畫畫看人今
古滔滔等晨夜俯仰蹟已陳電掣明窓鏘宣和殿
中嘗寶玩題品愈重千金價當時內府收欲觀誰

敢借流落長存天地間在在護持宜有神物為憑
藉漢郡蒲道源

鼎立門庭理一同何須局面互爭雄誰知奪角銜
關事都在山僧冷眼中吳僧白雲英

外錄

董思白容臺集題吳周生藏王右丞奕棋圖云畫
圖與此卷余見之長安高郵楊州守家正合劒時
也忽忽三十年又為新都吳周生所得陳太常所

謂見詩者不能見其圖亦屬缺陷雖然以畫法論
恐右丞之蹟北宋猶如星鳳安能傳至近代絹素
如新或後人得詩卷而擬作以配者周生可無遺
憾矣

摩詰雪溪圖

王維雪溪圖

宋徽宗
題籤

蓬萊道山人間風日不到玉笥金鑰典祕甚嚴有
平生畜眼未見者天旋地轉散落委棄故人李君

祥得之出以示余其犀玉已被剔取所幸畫無恙
耳展玩之餘不覺涕泪闌干蓋嘆是圖之不遭也
請靳固之以待異日萬金之購云蓬山道人劉詡
題

治平二年正月十九日沈邁章岵晏崇金山同觀
外錄

項子京云余三十年前獲觀右丞此幅僅盈尺有
咫設色高古位置幽遠有刺篙濟渡者有牧奴驅

豕而歸者神彩溢目餘所見皆優孟也今在一友處命庸工裝一時粉墨狼藉神氣索然偶復見之
惋悵累日

珊瑚網云此卷歸程季白入唐宋元寶繪冊二跋俱截去

王右丞江山雪霽圖卷

畫家右丞如書家右軍世不多見余昔年於嘉興項太學元汴所見雪江圖多不皴染但有輪廓耳

及世所傳摹本若王叔明劒閣圖筆法大類李中
舍疑非右丞畫格又余至長安得趙大年臨右丞
林塘清夏圖亦不細皴稍似項氏所藏雪江卷而
竊意其未盡右丞之致蓋大家神上品必于皴法
有奇大年雖俊爽不耐多皴遂為無筆此得右丞
一體者也最後復得郭忠恕輞川粉本乃極細謹
相傳真本在武林既稱摹寫當不甚遠然余所見
者庸史本故不足以定其畫法矣惟京師楊高郵

州將處有趙吳興雪圖小幀頗用金粉閒遠清潤
迴異常作余一見定為學王維或曰何以知是王
維余應之曰凡諸家皴法自唐及宋皆有門庭如
禪燈五家宗派使人聞片語單詞可定其為何派
兒孫今文敏此圖行筆非僧繇非思訓非洪谷非
闕全乃至董巨李范皆所不攝非學維而何今年
秋聞金陵有王維江山霽雪一卷為馮開之宮庶
所收亟令人走武林索觀宮庶珍之如頭目腦髓

以余有右丞畫癖勉應余請清齋三日始展開一
過宛然吳興小幀筆意也余用是自喜夙世謬詞
客前身應畫師余未嘗得覩其蹟但以想心取之
果得與真有合豈前身應入右丞之室而親攬其
盤礴之致故結習不昧乃爾耶庶子書云此卷是
京師後宰門拆古屋於折竿中得之凡三卷皆唐
宋書畫也余又妄想彼二卷者安知非右軍蹟或
虞褚諸名公臨晉帖耶儻得合劒還珠殊足辦吾

兩事豈造物妬完聊畀余於此卷中消受清福耶
萬歷廿三年歲在乙未十月之望秉燭書於長安
客舍董其昌

甲辰八月廿日過武林觀於西湖昭慶禪寺如漁
父再入桃源阿閤一見更見也董其昌重題

外錄

珊瑚網云馮開之快雪日記云吳崑麓夫人與予
外族有葭莩之親偶攜此卷見示述其先得之管

後宰門小火者家有一鐵樞門閤或云漆布竹筒
搥之似有聲一日為物所觸遂破墮三卷此其一
也然雙槐歲鈔有云純皇好玩名畫古器南京西
華門舊有二黑漆圓櫝振之則中空有聲蓋國初
巨室之籍入者以不可啓視故棄於此守閤小內
史張本穴而窺之則畫幀存焉一為王維傳色山
水約三丈餘一為蘇漢臣所繪宋高宗瑞應圖本
以王畫送安寧蘇畫送黃賜皆太監坐廠守備者

未幾寧死賜攘得之併以獻上賞賚甚厚益加寵
任是二事何相符至此然雪霽圖有沈石田跋或
即張本所得而流傳至此好事者重扃閉之偶入
小火手耶此卷海內推為墨王自有神物護持之
也

古畫評云馮開之太史云予每展江山雪霽圖卷
便覺神峰吐溜春圓生煙真若蠶之吐絲蟲之蝕
木至於粉縷曲折毫膩淺深皆有意致信摩詰精

神與水墨相和蒸成至寶

書畫舫云禾興馮開之祭酒博雅好古與從兄烈
愍公字季修有國士之知自述其家藏唐宋名蹟
頗多而王維江山雪霽圖尤為冠絕原係大元內
府故物曾經趙子昂鑒定者雖水墨短卷而有無
窮之趣兼近人題跋復得啓南翁筆海內稱為墨
王不妄也

王摩詰小簇山水

唐玄宗既命李思訓吳道子各圖嘉陵山水於大
同殿壁王維又別用絹素寫之謂之小簇茲所圖
山水具嘉陵三百里之勢正小簇法也一室之內
覺江山萬里非遙自韻子砢玉識

王右丞釣雪圖

外錄

妮古錄載董玄宰云王右丞畫余從樵李項氏見
釣雪圖盈尺而已絕無皴法石田所謂草樹凌競

人跼蹐者最後得小幅山水乃趙吳興所藏頗類
營丘而高簡過之又於長安楊高郵所得山居圖
則筆法類大李有宣和題危樓日暮人千里敲枕
風秋鴈一聲者然總不若馮祭酒江山雪霽圖具
有右丞妙趣予曾借觀經歲今如漁父出桃源矣

右丞花樹雲山圖

小
幀

外錄

書畫舫云傳聞右丞花雜重重樹雲輕處處山小

幀在文徵仲太史家紙本淺絳色布景極異落筆精微以較馮氏所藏江山雪霽圖可方駕也此畫原係矮直幅太史恐其日久愈壞命工補綴為短卷有詩題其後云維又有維摩示疾圖輞川圖

王右丞江干雪意圖卷

絹本高九寸長七尺上有御前之印內合同印奉華堂印

揭傒斯印

城中十日暑如炙頭目眩花塵土塞僧樓今日見此卷雪意茫茫寒欲逼古桺修柳枝嫋嬌下有幽

篁厠叢碧隔溪膠艇不受呼平地貫渚無人迹西
風翻鴉忽零亂遠鴈迷雲猶啞啞筆疎墨淡精神
在收閱千年若完璧宛然一段小江南三遠備全
能事畢維名依稀半未湮老眼再摩初認得所存
亦是天假借名手當時重唐室吳中人家寶古蹟
自宋及元高爾直若教見此風斯下倒橐定應無
忤嗇錦標內帑固自有人問閭出鳳五色老余尺
素見雪渡草樹凌競人跼蹐僅有方尺不盡意何

如此圖長數尺太丘子孫具法眼金壁收藏加襲
百我將拙語敢印正聊寫心知並目識 王右丞
之筆神妙之致悠遠之代見亦罕矣余於沙溪陳
氏獲觀雪渡圖盈尺而已今又於以岩所閱此脩
卷深幸老年擊此於目敬題之弘治壬戌之中秋
日後學長洲沈周

吳生落筆風雨快坡翁第一推神怪尤於維也無
間言閒遠當求之象外京師憶見輞川圖孟城鹿

柴相縈紆頭風恍爾頓失去古蹟皆云絕世無元
龍孫子好事者授我矜如珠蒲把謂言無意意獨
深詩裏陶潛琴賀若問君何從得此圖破篋蛛絲
知者寡我從見之加什襲氣壓營丘並馬夏寒林
昏鴉棲復驚平墅慘淡烟雲生湖光潏潏月未起
雪白蘆花天隔水鴈飛噤亂行且鳴下瞰平沙如
欲止欲止未止還自疑水碧沙寒愁莫對瀟湘兩
峰有如此昔讀維詩今見之翻思盤礴誰所丐桓

玄寒具油仍在千年晦剝一朝完臨卷摩娑發長
慨震澤王鏊題

右丞山水入神品昔人所評雲峰石色迴出天機
筆意縱橫參乎造化李唐一人而已宋米元章父
子時代猶不甚遠故米老及見輞川雪圖數本之
中惟一本真餘皆臨摹幾如刻畫且李營丘與元
章同是北宋當時偽者見三百本真者止二本欲
作無李論况右丞蹟乎余在長安聞馮開之大司

成得摩詰江山霽雪圖走使金陵借觀馮公自謂
寶此如頭目腦髓不違余意函致邸舍發而橫陳
几上齋戒以觀得未曾有又應馮公之教作題辭
數百言大都謂右丞以前作者無所不工獨山水
大幘傳寫猶隔一塵自右丞始用皴法用渲運法
若王右軍一變鍾體鳳翥鸞翔似奇反正右丞以
後作者各出意造如王洽李思訓輩或潑墨瀾翻
或設色娟麗顧蹊逕已具模擬不難此於書家歐

虞褚薛各得右軍之一體耳此雪霽卷已為馮長
公游黃山時所廢余往來於懷自以此生莫繇再
覲頃於海虞嚴文靖家又見江干雪意卷與馮卷
絕類而沈石田王守溪二詩亦同煥若神明頓還
舊觀何異漁父入桃源駭目動心書以志幸董其

昌題

摩詰精能圖

外錄

書畫舫云王維作精能圖在韓氏紹興祕府本極佳前有思陵御題乾卦紹興小璽並真其後曲脚封字印係後人偽刻用之按精能者名山之目也或曰品題畫語亦得此畫絹本細山水備極水墨兼行筆法云余熟辨之不過荆關遺蹟終非右丞家法爾近聞一大老以三百千置之卒以殉葬則惑矣

王右丞山陰圖卷

外錄

書畫舫云樵李項氏舊藏王右丞山陰圖卷余曾
兩閱之畫屬趙承旨手筆左方李孝彥吳繼贊仲
元臧似矩等前後題名雖屬古筆並從他處移來
其賈洵識尾殆好事家補造增入猶是無大決裂
也閱至米禮部題不覺失笑噴飯滿案蓋跋語為
蘇文忠評燕龍圖山水者後人做米體書之止易
燕公作王公耳禮部乃崛強人必不屑全錄他人

著述作自己結撰爾鑒定書畫須是細辨真蹟改
造以定差等多見俗子將無名古畫亂題款識求
售或見名位輕微之筆一例剗去題識添入重名
偽款所以法書名畫以無破損為上間遇破損處
尤當潛心考索毋使俗子得行其伎倆方是真賞
右丞畫本

外錄

書畫舫云今世相傳右丞畫本有人家在仙掌雲

氣欲生衣以為出右丞盤礴丑按張承吉詩有山
光全在掌雲氣欲生衣特本此耳

右丞圓光二水圖卷

外錄

書畫舫云右丞圓光二水卷在余家絹本水墨形
如織成後有前元諸賢跋韓朝廷故物也

米氏畫史云張修家有辟支佛下畫王維仙桃巾
黃服合掌頂禮乃是自寫真與世所傳關中十大

弟子真法相似世俗以蜀中畫驪網圖劍門圖稱
王維甚衆又多以江南人所作雪圖為維但見筆
清秀者即命之

又云榮咨道收雪獵圖命為王維不類張氏辟支
佛畫合掌像林木類蜀人筆雪山精好是唐物維
則未也

畢宏

畢京兆山水

外錄

米氏畫史云蘇舜欽子美家有畢宏一幅山水奇古題數行云筆勢凶險是也

又云沈括收畢宏畫兩軸一幅上以大青和墨大筆直抹不皴作柱天高半峰滿八分一幅至向下作斜鑿開曲欄約峻崖一瀑布落下兩大石塞路頭一幅作一圓平山半腰雲遮下磧石數塊一童抱琴由曲欄轉山去一古木臥倚石奇古沈謫秀

日見之及居潤問之云已易與人竟不再出至今
常在夢寐

戴嵩

戴巡官牛圖

外錄

襄陽志林云元章在漣水時客鬻戴嵩牛圖余借
留數日以摹本易之不得客謂原本牛目中有牧
童此則無也

又云無名人畫甚佳今人以無名為有名不可勝
數故諺云牛即戴嵩馬即韓幹鶴即杜荀象即章
得是也

戴嵩鬪牛圖

絹本中挂幅著色兩牛抵觸二童子拋擲戲具避匿樹竇震撼之聲惶懼之色

奕奕絹素間

張璪

張文通松石圖

外錄

畫鑒云張皞松石清潤可愛平生嘗見四本並佳
後得山堂琴會圖趙子昂見之欲得不與因題云
張皞松人間最少此苟幽深平遠如行山陰道中
誠寶繪也

唐朝名畫評云張皞員外衣冠文學時之名流畫
松石山水當代擅價惟松石特出古今得用筆法
嘗以手握雙管一時齊下一為生枝一為枯枿氣
傲煙霧勢凌風雨槎枒之形鱗皴之狀隨意縱橫

應手間出生枝則潤合春澤枯枿則慘同秋色其
山水之狀則高低秀麗咫尺深重石尖欲落泉噴
如吼其近也若逼人而寒其遠也若極天之盡所
畫圖障人間至多今寶應寺西院山水松石壁是
也亦有題記精巧之迹可居神品云

米氏畫史云錢藻收張璪松一株下有澗流上有
斷句云近溪幽處濕全藉墨烟濃高公繪亦有張
璪澗底松

書畫舫云唐人畫本如王洽之潑墨山水張璪之
松石新圖一則羣品稱逸一則衆論稱神皆可寶
藏第洽筆近世絕響余僅見其雲山圖卷墨氣臻
妙自然天成璪畫猶及見兩本瑯琊王氏祕藏澗
底松小幀後有宋高宗題識筆法穎異真絕品也

周昉

周昉士女圖卷

泥金字
標題

款書

臣周昉進

外錄

珊瑚網云弓為宋祕府所藏前立一女官紫袍束帶翠靴尖利如鞋弓兩手橫扇柄扇坐者應是妃嬪行戴碧玉蓮冠蟬紗映皙肌儼海棠初放按紈若有所思一侍女側髻若羊角手捧澡瓶素裳赤襦綠帛作歧頭樣一侍女圓髻若盂鉢花衫綠裙紫帛如前女式持帨於左一侍女拖髻若懸壺白襖紫禪紅帛亦如前女式抱琴俟抽抽者為垂鬟

女子淡紅袍硃束紛紅幫更纖蹻也其抽琴囊甚
力一姬以手擁髻體硃嬖姍衣錦却立一裹唐巾
後垂二帶紅袍繫鞵上下花補子握鏡向姬一姬
髻頂覆如意插半月小梳凡三持小團扇倚繡床
支頤生倦態一姬髻分心披後如巾幅著花半臂
拈鍼引線向繡棚一作墮馬髻紫花悅圍腰對前
姬刺繡一堆髻向頰儼宓妃妝綠衣紅襠背坐揮
小紈一高髻大於面文綺殷爛著綠絲屨和身靠

桐樹凡十三人惟二女官及兩小鬟身小餘俱肥
大腰腹無異懷娠而肩則坦削具穠麗狀如畫史
所載吾禾項子京即以所載跋後焉又項氏有號
國夫人行游圖為周昉筆素地盡已爛去惟人馬
獨存僅八騎也容體較前圖殊清俊

書畫舫云周昉揮扇士女卷在韓太史家原係宋
思陵題張受益故物也其畫細描重著色前後凡
十三人為妃后者四圖窮有樹一株雖絹素破故

而神采奕然真奇蹟也第恐更百年後稍久脫落
無復神蹤可尋一味按籍品較何殊捕風繫影耶
又見景元春宵祕戲四段人物古雅設色沈著近
為好事家分藏亦奇蹟也

米氏畫史云古畫至唐初皆生絹至吳生周昉韓
幹後來皆以熟湯半熟入粉搥如銀版故作人物
精彩入筆今人收唐畫必以絹辨見文粗便云不
是唐非也張僧繇閻令畫世所存者皆生絹南唐

畫皆粗絹徐熙絹或如布

周景元袁安臥雪圖

外錄

書畫舫云丁晉公始典金陵陞辭之日真宗出周
昉袁安臥雪圖曰付卿到金陵可選一絕景處張
此謂遂張於賞心亭云事見郭若虛圖畫見聞志
此圖今在嚴分宜家近見子昂袁安臥雪卷先後
題詠者凡十八人皆一時韻士蓋為袁通甫作也

又都玄敬寓意編自言收得范寬袁安臥雪圖卷
筆法妙入神不知今在何處須留心細訪之

周仲朗按箏圖

外錄

廣川畫跋云龍眠居士知自嬉於藝或謂畫入三
昧不得辭也嘗得周昉畫按箏圖其用工力不遺
餘巧矣媚色艷態明眸善睐後世自不得其形容
骨相况傳神寫照可暫得於阿堵中耶嘗持以問

曰人物豐穰肌勝於骨蓋畫者自有所好哉余曰此固唐世所好嘗見諸說太真妃豐肌秀骨今見於畫亦肌勝過骨昔韓公言曲眷豐頰便知唐人所尚以豐肌為美昉於此時知所好而圖之矣

周長史惜花士女圖

外錄

書畫舫云周昉惜花士女圖在韓氏精采生動所見昉畫宜為冠

周仲朗西域職貢圖卷

外錄

書畫舫云茂實府君舊藏周昉西域職貢圖一高頭短卷前有宋徽宗瘦金標題後有明昌等印記歸之韓太史余嘗按宣和明昌二帝題簽法書用墨名畫用泥金又宣和天水雙龍印有方圓二樣法書用圓名畫用方也

又云高宗御府手卷畫前上白引縫間用乾卦圓

印其下用希世藏小方印畫卷盡處用紹興二字
長印墨蹟不用卷上合縫卦印止用其下希世小
印其後仍用紹興小璽

又云古人題畫書於引首宋徽廟御書題跋亦然
故宣和間稍書畫用黃絹引首也近世多書於畫
首趙松雪云畫至元朝遭一劫也

周仲朗五星真形圖

外錄

研北雜誌云張與可家有周昉五星真形圖昉為
宣州長史日所畫其星法亦昉手自書

周長史托塔天王像

外錄

書畫舫云周昉托塔天王像大著色與韓氏揮扇
士女卷相仿神采動人當是真筆

周景元白描過海羅漢圖卷

外錄

書畫舫云周景元白描過海羅漢圖卷見嚴嵩抄
沒籍中後歸武林高深甫家載之尊生八牋品為
天下名畫第六不腆評定為盧楞伽者乃是也文
休承嚴氏書畫記亦列周昉名下蓋沿習之誤耳

景元春院鬪鷄圖

昔郭汾陽之女謂周昉貌趙並得其神情今觀此
春院鬪鷄圖閨人具穠麗豐肥之態稚子得嬉笑
襁負之狀介冑膂膊竦身悍目昂尾矯興蹠蹀高

舉正在阿堵中也更竹樹花石種種咸臻六法應
出仲朗手然歟時維流火之初南枝蓓蕾作一二

花妃水方流玉水子記於凝霞墨花二閣書畫笥

仲朗欠伸美人圖

絹本掛幅長三尺三寸餘闊一尺六寸淡色美人長尺許背立迴身

畧呈半面舉手欠伸體態綽約淡妝逸韻芳香襲人石畔辛夷花一株著色鮮潤本身絹上有內府圖書建業文房之印蓋歷代所珍祕者舊有東坡一跋今不存趙松雪嘗有臨本

微步柔桑陌上塵辛夷花下一酸辛何人敢與千

金贈獨背春風畧欠伸句曲外史張雨題

日長睡覺瑣牕深
偶向花前一欠伸
却憶行雲無覓處
夢中心事付何人
光弼

韓幹

韓左軍馬圖卷

幹馬圖

三大字
引首

止菴書

吾自小年便愛畫
馬邇來得見此韓幹
真蹟乃始得其意
云子昂題

山陰王懌家藏

唐人畫馬如相馬不在驪與黃天機入神即揮灑
氣脫毫素先騰驤昔年曾畫穆王游八極八龍之
駿雲五色後來又寫越影超光脫丹碧後來又寫
漢武窮渥洼復見神駒來漢家勢走滅沒開風沙
壯哉此馬健且雄玉花徧身雲滿鬃首如渴鳥眼
如電皎如足練橫晴空使之陷陣當破敵萬馬不
敢先秋風如何解鞍脫其韁縱爾倣儻如游龍君
不見四海罷征戰九夷盡梯航方將却爾宛水之

西歸爾華山之陽幸逢韓供奉寫爾神杜拾遺歌
爾良贈爾支道林愛爾神駿懸高堂陸游題

龍媒神飛影在紙雙瞳墨濕電光紫烏首昂昂渴
奔水青鬃迎風拂不起逸氣難居阜櫪底勢欲陪
龍走千里月支真馬有如此落筆一與王生似云
是吾州韓畫士長安趙說題

韓公畫馬稱神筆矯首昂藏山鬼泣眼明見此飲
馬圖乃知渠度不可軼定嫌昔日徐庾體渴驥奔

泉超法律騏驎驪志千里屹立天開廿伏樞氣
勢相宜適操縱肉骨兼勻稱肥瘠世人但以驪黃
求翠駁玉花煩剪剔若論右軍愛鶯趣支公愛馬
應成癖山陰道士不換經已悟黃庭養生術持將
此卷參馬祖待須一口西江吸江陵吳靚題

左輔周垣隱白沙龍媒絕種進天家驕嘶玉勒憐
豐草渴飲冰泉帶落花西狩還經千里棧東巡會
駕五雲車權奇滅沒猶驚電漫許拳毛世特誇岑

津

圉人唐衣冠天閑畜神駿雖非金日磾不忝張景
順飽食無嫌身賤卑時其渴燥張飲之長年牧養
瘠者肥龍鬐鳳臆誇權奇韓幹仙翁揮翰手毫端
幻出渴烏首氣不凋喪骨肉勻藝精端繼王裴後
遙想騰驤析木津銜勒難拘自在身斗水底用求
他人淥波汙汙易水春吳興謝朓
奚官小臣職奚為馬饑則秣渴飲之龍媒八尺千

里姿雪花被身雲陸離洼之異種來天池乘輿重
惜閒驅馳河清海晏無盤嬉壯士老死不得騎御
柳春深白日遲寒甃淨汲冰花漪目光注電吻沫
脂振迅欲掣青絡絲奚官小臣謹厥司猶恐若後
呵譴施不必前身作馬通馬語人心物性在善推
嗚呼奚官小臣身賤卑馬不如人愚亦知奈何為
人牧重爵厚祿不卹民渴饑剗刮膏血剔肉肌坐
令溝壑轉老羸今之龔黃卓魯誰雲林藪社時所

師為出馬圖陳詩為淮陰襲復題

韓公胸次有神奇寫得天閑八尺駒曾為岐王天
上賜不隨都護雪中驅霜蹄奮迅追飛電鳳首昂
藏似渴烏春草青青華山曲三邊今日已無虞吳
興錢選舜舉

何年供奉仙寫此真乘黃矯矯天骨起爛爛隅目
光豈無萬里姿御者非王良青衫老奚官肉眼空
俵俵飲秣不以時羈馭無繇驤昂首思渥洼浩蕩

充虛腸何來斗斛水似是出尚方雖霑金井恩未
效和鸞鏘蹭蹬十二閑何異古道傍回首萬駑駘
飽食馳康莊朝飲華清流暮垂紫游韁此馬獨棄
捐物理良可傷君王倘惠養請試苜蓿長石林道
人呂量

渴烏項領紫駝峰跑地求泉鬣上衝不敢牽來向
江水預防踴躍學蛟龍天台高翔

圉人扈從溫泉宮曉汲清波浮落紅驂駟解語意

相得肉駿振動嘶春風天子臨軒催羯鼓繡茵檀
板登牀舞美人盼睐相輝光那復臨邊思報主潼
關夜半烽火明錦綳兒來坐大廷此馬棄捐何足
道顧影長城厭水腥丹丘柯九思賦

天廐馬神龍姿目如明星耳如錐拳花鬣毛雲陸
離揚鬣掉尾頰虹飛天廐馬閑且驕繫以青絲勒
以鑣渴不得飲瑶池泉饑不得食瓊田苗豆粟不
滿腸胃枵口不能語足屢蹠天廐馬壯且武食主

之食須報主莖秣失時罪在牧圉無如宋莊不得
嚼咀棄其國人仇敵是與天廐馬爾不聞趙時廉
將軍一飯斗米肉十斤披甲踞鞍走若雲破斬栗
腹殺劇辛北摧燕闕西却秦至今萬古稱良臣又
不聞漢季劉荊州有牛千斤角曲觥啖食十倍於
常牛負重不若一牝鹿老瞞渡江俘楚囚骨肉解
割庖刃游天廐馬飽爾食草間豺狼逭誅殛威孤
撥刺矢末直嗟爾神駿須盡力他年定遇田子方

樞上優游感恩德括蒼劉基

龍性難馴萬里姿駸駸只欲望風馳奚官毋惜斗
升水要載君王問具茨吳郡姚道昌

五花雲散紫電光縶維未許飛龍驤垂頭欲就圉
人飲渴烏作勢吞銀潢長安畫史擅筆力萬里猛
氣收毫芒羽人乘風倦鞍勒一笑收拾藏巾箱世
人不識真驕驕顧影尚爾分驪黃放鶴峰前有遺
意神駿政可誇支郎韓性

將軍西征過崑崙戰馬渴死心如焚策勲脫鞍瀉
汗血一飲瑤池三尺雪身如飛龍首渴烏白光照
夜瞳流月長城凍合霜草乾駿骨削立天風寒木
牛沈絕糧道阻中軍餓守函谷關太平此馬惜遺
棄往往駑駘歸天閑區區芻粟豈足養忠節所盡
人尤難摩挲畫圖不忍看萬古志士空長歎雷門
唐珙

當時四十萬匹中出羣意氣偏豪雄三駿剪花蹄

削玉拳毛一團如旋風飛騰射獵南山下踏雪歸
來汗猶赭奚官乍卸紫馱韉解渴汲與華清泉鳳
頭青絲掣欲斷一口擬吸天池乾日奔千里如電
走飲秣翻落駑駘後東家蹇驢鈍莫驅熱浴冷水
饑齷芻賢愚否泰亦如此撫膺歎息良馬圖會稽
鄭嘉

韓公畫馬得馬趣落筆宛有盧遵風脂肥不見筋
骨露騰驤始知氣力雄朝逢圉人汲秋水精神炯

炯雙方瞳卷中題詩十五客唯有括蒼留古色卷
舒雪涕憶前修太息後來那可識越城戰鬪白日
昏故物紛披橫道側子雲持來慰愁寂如造長安
供奉堂前年沙漠射黃羊我馬飛行雲雪空誰挽
天河洗兵甲但騎款段還家鄉臨川危素題

宛國來廷日滎河貢篚年赤墀騰紫電金埒護非
烟表自殊方進恩從上國宣雄姿王緒識神駿九
臯憐蜀錦新裁韉秋金旋鑄鞭步應先八駿羣許

壓三千試處岐王躍看時太僕牽清泉來碧甃瑤
草獻瓊田弄影春芳裏驕嘶御柳邊聽歌長踴躍
教舞每蹁躑羯鼓聲逾壯鑾輿勢欲遷腥風搖太
液烽火逼溫泉幸蜀謀非晚殲關計失先潼關寧
赴敵渭水肯游畋殺氣橫西苑房星隱舊躔長安
悲汗血仍為寫真傳瞿祐

漢家天馬來西域項若啼鷄身八尺秋風嘶雨入
昭陵舊苑空餘烟草碧當年逐關向沙場千里萬

里行冰霜百戰歸來汗溝血斗水安足充枯腸食
君之祿為君使背義偷生真可恥臨川老客獨傷
心把卷看詩泪如水周景升

掉尾玉驄金絡頭驕嘶騰踏汲寒流莫教重過長
城窟水月光中漾髑髏張士奇

雲間凌嘉同松陵張元道馬成龍觀於東郭草堂
右唐韓幹用黃麻紙畫飲馬圖真蹟畫馬開元中
獨稱江都王緒曹髦之父子得骨肉勻停法於戲

筆處稱裴絳州天寶間雖陳閎名擅一時而韓幹不肯師謂其徒摹寫形似唯曹家沈著神采生動有自然風格所謂奇也惟元朝趙松雪深得曹韓之法今觀此圖風致縱橫隨意所如稱為神手且題識盈卷極諸名公鉅儒珠玉錦繡雲蒸霧蔚誠為希世寶也永樂丁酉仲秋月朔廬陵周岐鳳題吳興陸遂觀於四宜樓

韓公雙馬圖

馬中神駿

書圖前

元祐戊辰正月獲觀於才翁之子洎米黻記

太平興國翰林蘇氏

寶寧賜第觀紹彭

太原王堯臣 杜綰 轍從觀 秦觀 黃宗元

赤髯碧眼老鮮卑迴策如縈獨善騎赭白紫騮俱
絕世馬中岳湛有餘姿翁山蘇軾題

右唐韓幹所畫二馬今藏松江一士人家後有米

元章王堯臣薛紹彭蘇子由秦少游諸名手題名
及東坡翁絕句坡詩今見集中但集本以餘姿作
妍姿為不同耳近予又於冢宰石淙公處見幹馬
性圖亦是真筆惜無題識蓋世之售書畫者或為
贋本必移題識以規厚利若書畫既真人覽之自
知雖無題識可也吳郡都穆立敬父

外錄

書畫舫云絹本韓幹雙馬圖舊藏曹涇楊氏前題

馬中神駿後有米黻等題名並東坡絕句皆真蹟
妙絕余近收松雪翁摹本題云韓生雙馬圖子昂
為晉之臨神采飛動宛然韓公筆也韓又有圉人
呈馬圖

又云丑按幹嘗畫下生嗔彌勒精妙入神則幹又善
為道釋像不獨工畜獸也

畫鑒云韓幹初師陳閎後師曹霸畫馬得骨肉停
勻法遂與曹韋並馳爭先及畫貴游人物各臻其

妙至於傳淙色入縑素余嘗見其人馬圖在錢唐
王氏二奚官引連錢驄燕支驕又見一卷朱衣白
帽人騎騮五明馬四蹄破碎如行水中乃李伯時
舊藏在京師見明皇試馬圖調馬圖五陵游俠圖
照夜白粉本上有幹自書內供奉韓幹照夜白粉
本十字要之唐人畫馬雖多如韓曹特其最著者
後世李公麟伯時畫馬專師之亦可謂優入聖域
者也

韓滉

韓太沖五牛圖卷

絹本 矮卷
項氏家藏

余南北宦游於好事家見韓滉畫數種集賢官畫
有豐年圖醉道士圖最神張可與家堯民擊壤圖
筆極細鮮于伯幾家醉道士圖與此五牛皆真蹟
初田師孟以此卷示余余甚愛之後乃知為趙伯
昂物因託劉彥方求之伯昂欣然輒贈時至元廿
八年七月也明年六月携歸吳興重裝又明年濟

南東倉官舍題二月既望趙孟頫書

右唐韓晉公五牛圖神氣磊落希世名筆也昔梁武欲用陶弘景弘景畫二牛一以金絡首一自放於水草之際梁武歎其高致不復強之此圖殆寫其意云子昂重題

此圖僕舊藏不知何時歸太子書房太子以賜唐古台平章因得再展抑何幸耶延祐元年三月十三日集賢侍讀學士正奉大夫趙孟頫又題

卷後有魯

孔克表一跋失
錄克表字正夫

外錄

渭南集跋韓晉公畫牛云予居鏡湖北渚每見村
童牧牛於風林烟草之間便覺身在圖畫自奉詔
紬史逾年不復見此寢飯皆無味今行且奏書矣
奏後三日不力求去求不聽輒止者有如日嘉泰
癸亥四月一日陸游書

米氏畫史云世俗見馬即命為曹韓韋偃見牛即

命為韓滉戴嵩甚可笑唐名手衆未易定惟薛道
祖紹彭家九馬圖合杜甫詩是真曹筆餘唐人大
抵不相遠也又金陵有唐人韓滉畫牛今人皆命
為戴戴蓋差瘦也

韓晉公五牛圖卷

明顧氏芸閣
藏黃麻紙本

外錄

珊瑚網云公諱滉字太冲休之子史稱其在德宗
朝駸駸無言深得相體矧出將又得統鎮之制此

全人矣書法張顛畫師陸探微嘗自言不能定筆
不可論書畫豈尋常筆墨所能彷彿哉牛圖黃麻
紙上徽廟金書標題辛未歲余得是卷適項孔彰
來見之即取案頭宣德紙影去自此臨本不少其
趙松雪三跋孔克表一跋為竹懶翁刻六硯三筆
而卷已旋售真如煙雲之過眼然余所存戴嵩牛
牛目中有牧童影猶足侈夜郎王也

韓太沖田家移居圖

外錄

書畫舫云韓滉田家移居圖明昌祕府官本天順
成化間跋者三人今在武林高深甫家筆法奇妙
絹素完好乃嚴分宜之故物也史稱滉忠勤王室
相業可師復能留心繪事筆墨神奇抑何多才藝
耶

又云韓滉畫品妙絕古今同時有山人戴嵩者色
色師滉而牛則稱獨步矣

太沖明皇演樂圖

外錄

書畫舫云唐畫明皇演樂圖大幅亦在韓太史存
良家無名人畫極佳上有晉府收藏印或云韓滉
筆也滉為中書令封晉國公謚忠肅工於書畫畫
體生成之蹤書合自然之理其遺蹟世頗有之按
文休承嚴氏書畫記載晉公演樂圖一其真是耶
畫鑒云韓晉公滉工畫人物及牛圖佳嘗見其田

家移居圖村童螳戲圖醉客圖鼓腹圖醉學士圖
及牛圖數本人物源流顧陸牛圖是公所長戴嵩
得其緒餘有名於世此蓋人物不及而牛獨過之
也

顧況

顧逋翁江南春圖袖卷

外錄

書畫舫云昔聞琴川劉以則孫某祕藏顧況江南

春圖袖卷後有宋元名賢題跋筆法瀟灑天真爛
然近始見之項氏昔人評況畫品入神源出王洽
而秀潤過之殆非過許云況又有茅山圖

又云吳邑顧況人品清逸能詩畫工真行書前惟
滎陽鄭虔後惟孤山林逋庶幾近之外是三絕或
可繼響而人品固難乎其為同調矣詠顧處士江
南春圖小本詩逋翁詩酒外妙寫江南春清逸不
火食堪為摩詰鄰

名畫記云顧況字逋翁吳興人

一云吳縣人

不修檢操

頗好詩詠善畫山水初為韓晉公江南判官入為
著作佐郎久次不遷乃嘲誚宰相為憲司所劾貞
元五年貶饒州司戶居茅山以壽終有畫評一篇
亦為精當也

畫錄云江南春圖始於顧逋翁皇宋惠崇袖卷更
奇勝國倪迂亦嘗做倣作之並題詩二首後人和
章極多好事家編為江南春集鏤板行世亦可傳

也

書畫舫云惠崇江南春圖紙本小袖卷清逸之極
不讓顧逋翁手筆今在王氏董玄宰太史極稱許
之自非莊列高風畫卷可擬議也聞有秋塘聚禽
圖筆趣更勝

王洽

王洽畫

外錄

名畫記云王洽

或云名點

畫師項容風顛酒狂能以頭

髻濡墨作畫亦一奇也洽蚤年受筆法於鄭虔落筆便有奇趣後以筆法授顧況頗為雄壯貞元末洽卒於潤州舉柅若空時人皆云化去矣

書畫舫云王洽潑墨成圖掃盡俗工刻畫陋習足稱米高鼻祖惜其畫本罕存幾為烏有先生良可太息

趙德齊

趙待詔瑤島會真圖

雙幅絹本高六尺共闊三尺六寸大青綠仙山右聳蓬海左環

橫空樓閣掩映珠簾簾外女侍二翠樹離立中庭
各垂瓔珞從閣而下一路曲磴迴闌白雲隱見轉
左乳松三株松下仙妃緩步左右扶行女童各一
前導捧香花者各一後從女侍十三有持羽扇者
有擎幢奉壺抱琴携具者遠近翩跹似赴羣真之
會其筆蹤青綠盈幘金粉溢目一歸恬樸古致絕
非宋後名家可及

胡瓌

胡瓌番部卓歇圖卷

外錄

書畫舫云絹本胡瓌番部卓歇圖塵垢破裂神彩
如生明昌中祕物也今在韓氏此卷雲烟過眼錄
困學齋紀聞並詳載之

胡范陽番部橐駝圖

外錄

書畫舫云范陽胡瓌工畫橐駝番馬用筆清勁渲
染有法近於文氏獲觀番部橐駝圖前有政和宣
和兩璽後有徽廟瘦金書御題胡瓌二字雖絹素

百破而設色如新人馬皆有生氣遠勝東丹王家
法也乃王徵君百谷跋語云此圖既非出獵又非
入貢不知云何豈亦未識其名耶

胡虔

胡虔秦人汲水圖

外錄

書畫舫云胡虔秦人汲水圖筆法古勁大有父風
都玄敬有跋真蹟也

荆浩

洪谷子山莊圖

外錄

書畫舫云河內荆浩博雅好古善畫山水值五季
多故隱於太行山之洪谷自號洪谷子著山水訣
行世所製山莊圖簡古勁健在李公麟上傳世之
珍也舊傳鄴都青蓮寺沙門大愚嘗乞畫於浩寄
詩以達其意云六幅故牢健知君恣筆蹤不求千

澗水止要兩株松樹下留磐石天邊縱遠峰近巖
幽濕處惟藉墨烟濃後浩圖成亦以詩答之云恣
意縱橫掃峰巒次第成筆尖寒樹瘦墨淡野雲輕
巖石噴泉窄山根到水平禪房時一展兼稱苦空
情其為人風流文雅如此浩又有古松圖峻峰圖
襄陽畫史云范寬師荆浩浩自稱洪谷子王詵嘗
以二畫見送題勾龍爽畫因重背入水於左邊石
上有洪谷子荆浩筆字在合綠色抹石之下非後

人作也然全不似寬後數年丹徒僧房有一軸山水與浩一同而筆乾不圓於瀑水邊題華原范寬乃是少年所作却以常法較之山頂好作密林自此趨枯老水際作突兀大石自此趨勁硬信荆之弟子也於是以一畫易之收以示鑒者荆浩畫畢仲喻將叔處有一軸段緘家有橫披然未見卓然驚人者寬固青於藍

又云李成師荆浩未見一筆相似師闕全則著葉

樹相似

又云荆浩善為雲生山頂四面峻厚

畫鑒云荆浩山水為唐末之冠關仝嘗師之浩自號洪谷子作山水為范寬輩之祖

洪谷子寒林圖

絹本小挂幅水墨岩石嶺巔古木槎枒雪景迷濛瀑流斜噴兀對長夏寒

色森森不啻北風圖也

無名氏

香山圖卷

七人五百八十四拖紫紆朱垂白顱囊裏無金莫
笑歎尊中有酒且歡娛吟成六韻神還旺飲到三
杯氣尚粗嵬我狂歌教婢拍婆娑醉舞遣孫扶天
年高過二疏傳人數多於四皓圖除却三山五天
竺人間此會且應無俞和

碧樹丹崖處處春幅巾藜杖總閒身乾坤納納如
許大一代風流只九人方和謝雍

捕魚圖卷

外錄

書畫舫云錫山華氏藏唐人捕魚圖一卷運筆古雅無名人畫更佳好事者謂為王維極謬維畫原係單行小直幅元時在司進家見之雲烟過眼錄有宣和明昌御題璽記也

毛女圖

絹本
著色

結草為衣類鶴翎初來一味服黃精宮鶯幾處啣花出猶向山中認得聲粵人謝翱

秦宮一別竟忘還
飲露餐風駐玉顏
却笑祖龍仙分薄
蓬萊空望海邊山
清江教英

寶瑟無絃尚自隨
秦聲那復記當時
山頭剝棗分猿喫
雲裏巢笙喚鶴騎
見說劉郎驅阮籍
空勞徐市覓安期
華陰萬樹長松葉
却笑君王未得知
祝

允明

右三詩書
斗方裝後

白雲堆毛女一雙
丰姿端麗錯著綵
繒樹皮背絆筠籃
插花枝紛披如幕
咸握一偃月鉤其
亭亭玉

立者豐趺著草堦其皎皎傲雪者繫襪至脛穿芒
屨殊偏絹素細裂古色黯然殆唐人筆也或問何
以無彼時題者余舉唐詩曰曾折梭枝為寶櫛又
編櫛葉作羅襦有時問著秦宮事笑撫仙花問太
虛是即為萼華女寫照焉然有獨處者如玉姜輩
蘇文忠公云霧鬢雲鬟不著衣山川良是昔人非
祇應閒過商顏老獨自吹簫月下歸乃斯並肩者
其魚氏道超道遠為秦時女真人歟楊鐵崖所咏

華陰毛女藏雙魚餐松啖栢留春容若為此圖設
矣繡里脉望生識

書畫彙考卷三十九

欽定四庫全書

書畫彙考卷四十

刑部左侍郎卞永譽撰

畫十

後五代

趙巖

趙魯瞻神駿圖卷

一名調馬圖

南山之下沂渭之間想見開元天寶年八坊分屯

隘秦川四十萬匹如雲烟
騅駟駱驪騶驪白魚
赤兔騂皇韉龍顙鳳頸獐且好奇姿逸態隱駑頑
碧眼奚兒手足鮮歲時翦刷供帝閑
拓袍臨池侍三千紅粧照日光流淵
樓下玉螭吐清寒往來蹙踏生飛湍
衆工舐筆和朱鉛先生曹霸弟子韓旃
馬多肉尻臞圓肉中畫骨誇猶難
金羈玉勒繡羅鞍鞭箠刻烙傷天全
不如此圖近自然平沙細草荒芊綿
驚鴻脫兔爭後先王良挾策飛上天
何必

俯首服短轅 趙巖所畫此圖深得曹韓筆法余
亦好畫何能及也故以杜子美詩書之大德五年
菊節子昂

右調馬圖乃後梁駙馬都尉趙巖筆也巖喜丹青
工於人馬而胸次不凡能脫去筆墨畛域故其所
作與尋常畫手不同圖後松雪所題筆法精謹異
於他書豈亦重其畫而然耶此圖舊藏余友何翰
林元朗處今始見之因題其後時萬歷丁丑三月

廿日茂苑文嘉

趙巖畫人馬余不多見僅見此卷其筆法高古猶有曹韓遺意蓋梁人去唐猶未遠耳趙魏公得畫馬三昧者故深加賞歎錄杜拾遺長歌於其後微此歌此書不稱此畫矣然拾遺集無此作魏公何從得之古今詞人之作散逸不傳者多寧獨此歌而已余按圖索駿乃竝得詩恐非天廐真龍不傳老杜雕龍也壬戌中秋後五日太原王穉登題

丘文播

丘文播文會圖

大挂幅絹本一幅有半青綠冠帶生飲者九人扶杖倚樹對談者二人捧

匱筭執侍者九人共二十人磅礴榆柳松竹之側几席盤盂古致陸離桃李蓮房花果香鮮可擘座中歌者按板者拱而聽者酖醕者一一呼之欲下

李贊華

東丹王人犬圖

畫人物以得其情性為妙東丹此圖不惟盡其形態而人犬相習又得於筆墨丹青之外為可珍也

子昂題

唐胡瓌用筆清而圓度得筆於父熟而勁但清圓
微劣於父爾五代之贊華深於形似蓋自土風之
習前輩論筆乏壯氣信然今諸賞鑒多以東丹會
度大與譜叙不相表裏吾故表而出之大德九年
九月二十日無閑民云

外錄

襄陽畫學云東丹王胡瓌蕃馬見七八本雖好然

非齋室清翫

李昇

李昇林泉高隱圖卷

一名高
賢圖

自古雲林多隱者扶筇垂釣思悠然不妨濯足溪
流畔畫裡相看認古賢子昂

為厭繁華愛好山幽棲贏得此身閒生平已足林
泉興留取高名滿世間京口郭天錫

有客垂釣還展卷何人策杖且觀雲掀髯濯足應

高士一種風標似不羣
虞集伯生

山青雲白萬林秋
中有隱者心
天游行來濯足天
池闊不與世俗同
朋儔
吳郡王希白頓首

拄杖尋幽問草堂
獨看濯足向滄浪
展書把釣何
為者又用閒心靜
裏忙無碍居士

外錄

書畫舫云項氏收藏李昇高賢圖一絹本大著色
行筆極古布景尤異真有山頂蒙茸木身圓挺之

勢昇蜀人寫彼土草樹米老稱其種種木葉古未有倫不虛也卷前有宋思陵御題竝紹興小璽後有趙子昂等五詩書畫兩優其為絕世名蹟信矣又云李昇畫本細潤中有氣韻極為米南宮所賞識橋李項氏藏其高賢圖一卷蒼茫大類董源而秀雅絕似王維或謂昇畫彷彿李思訓殆擬非其倫矣昇又有瀟湘烟雨圖楊通老移居圖

米氏畫史云余昔購丁氏蜀人李昇山水一幀細

潤而秀上危峰下橋涉中瀑泉松有三十餘株小
字題松身曰蜀人李昇以易劉涇古帖劉刮去昇
字題曰思訓易與趙叔盜今人好偽不好真使人
歎息

又云李文定孫奉世子孝端字師端收薛稷二鶴
唐李昇著色畫三軸其一幅山水舟舫小人物精
細秀潤其二幅畫長林石岸茅亭溪水數道士閒
適人物差大反不工於小者木石天成都無筆踪

其三幅峰巒秀拔山頂蒙茸松林層際木身圓挺
度非歲月不可了一畫人間未見如此之細且工
雖太茂密林中不虛而種種木葉古未有倫今固
無有與余得於丁氏者無異也

小李將軍太上度關圖

外錄

書畫舫云李昇太上度關圖筆法古勁定在吾家
劉松年卷上為真無疑

又云李昇畫品神化爾雅足稱董北苑黃鶴山樵
之鼻祖即悉力擬倣僅能得其彷彿不知者謂昇
畫源出李思訓此蓋謬論按思訓遺蹟行筆精細
其尖銳若有餘濃古者則未之見也

阮部

阮部閨苑女仙圖卷

絹本高一尺三寸長五尺餘隔水綾上有內府合同養字十九

號字一行及宣和收藏諸印按宣和畫譜御府所藏部畫有四此其一也樹石皆用金碧間以珊瑚琅玕之屬景物瑰麗望而知為仙境仙姬五人侍從者十六人皆古衣冠翱翔往來為態非一鄧子

方所題得
其髣髴也

阮郛是五代人仕太常以善畫人物士女鳴於當時蓋多習於唐周昉王拙筆法世傳不多得今觀此女仙圖有纖穠淑婉之態瑤池閨苑風景霓旌羽蓋飄飄凌雲萼綠雙成可以宛見令人玩愛不肯釋手而此曾入宣和內府復克傳至於今誠為珍寶當什襲之重於白珩也時元統甲戌重九日觀於崇真萬壽宮之承慶堂商挺題

閨風玄圃仙女居阮生寫作羣仙圖蒼松根老琥
珀伏海波突起珊瑚株翠樹瑤華紛遠近細草若
展青攴榆樓臺迴隱五雲表別有世界非堪輿仙
姿縹緲各有態絕食烟火餐瓊蔬兩仙拈筆點花
露長者晏坐看琅書一仙倚石閒摘阮一仙偃蹇
披長裾其中一仙速相就珮聲微響如雲趨羽扇
雲環盡婀娜忽見龍鶴來天衢翩然復有一仙至
乘飈御氣三從俱我疑數仙天帝女帝帝傍暫別遊

清都俯視塵網中穢濁何紛如人間光景疾如箭
壺中日月無居諸舞白鳳歌且謠有耳只解聞雲
韶永超劫外何逍遙紫陽真人特勿驕佇當來迎
共食瑤海桃上清鄧宇題於神樂方丈

關全

關全春山谿閣圖

外錄

珊瑚網云山色濃綠如潑樹屋以墨染之筆愈簡

而氣愈壯景愈少而意愈長畫史稱其師荆浩晚年有出藍之美余後得洪谷子雲壑圖真有筆有墨者畫家競多荆關余何幸獲此雙璧

關仝仙游圖卷

外錄

書畫舫云張伯起自言少時頗有畫癖購藏關仝仙游圖行卷甚奇米海岳故物也真賞等印具存其先出丁相家亦見德隅齋畫品筆法淳古漸近

自然正如太羹玄酒不以餽飮為工者相傳全生平不善畫人物多求胡翼為之此後世畫人合作之始

德隅齋畫品云仙游圖唐關仝所作故相國丁公印章在焉全畫山水入妙然於人物非工每有得意者必使胡翼主人物此圖神仙翼所作也大石叢立屹然萬仞色若精鐵上無塵埃下無糞壤四面斬絕不通人跡而深巖委澗有樓觀洞府鸞鶴

花竹之勝杖履而遨遊者皆羽毛飄飄若仰風而
上征自非仙靈所居而何石之竝者左右視之各
見其圓銳長短遠近之勢石之坐臥者上下視之
各見其方圜廣狹薄厚之形筆墨略到便能移人
心目使人必求其意趣此又足以見其能也

米氏畫史云關全人物俗木石出於畢宏有枝無
幹

關全霧鎖山關圖

外錄

畫鑒云關仝霧鎖山關圖差嫩是蚤年真蹟在京師人家

畫系云長安關仝畫師荆浩而源出畢宏晚負出藍聲價喜作秋山寒林漁市山驛使夫觀者恍疑身在灞橋風雪中聞猿三峽不復知有塵俗狀蓋一時之絕云仝之為畫脫略毫楮筆愈簡而氣愈壯景愈少而意愈長深造古淡如詩中淵明琴中

賀若非碌碌畫工所能及也

關仝夏山欲雨圖

一名谿山
林木圖

外錄

書畫舫云關仝山水下筆辣甚錫山顧氏藏其夏
山欲雨圖小幀一名谿山林木上有天厯之寶蒼
古簡淡雲物粲然也又瑯琊王問伯亦嘗購得山
水一本樹石極粗皴法踈逸不知果為關畫否耳
又云關仝工於枯木筆粗李成妙於寒林筆細粗

者竟當讓細亦定論也向見全畫表安臥雪短卷
筆意簡遠所謂不患臣無二王法亦患二王無臣
法者

張戡

張戡獵騎圖卷

張戡居近燕山得獵人形骨之妙畫戎衣鞍轡之
精故入神品此卷非戡不能到余甚愛之宜什襲
珍藏吳興錢選舜舉

一犬前趨五馬隨赭袍公子跨烏騅壯游却憶飛
狐止正是清秋出獵時文水高若鳳

戎王小隊獵秋野豹尾服弓金絡馬蒼髯奚官喜
追逐隔馬相呼意閒暇鞭梢生風箭飛雨烏騅如
龍犬如虎沙平草淺狐兔肥穹廬月寒歸未歸晉
安林泉生

張戡者朔方人也當五季之世與胡瓌父子李贊
華房從真俱以善畫番部人馬之屬名於時其畫

以狼尾製筆蓋必有所取焉今觀戲所畫獵騎圖一卷其間人物犬馬弓矢服飾之類毫分縷析曲盡其妙觀其攬轡疾馳宛然有沙漠萬里之態於是知戲畫法精絕與胡瓌輩不相上下也吳郡沈右識

張戲妙筆最能寫寫出平沙好人馬赭衣壯士挾弓矢清秋出獵山之下山林霜後百草枯走犬前驅愁兔狐斯人往矣不可見撫時懷古披斯圖王

庭松謹題

燕角斜攷虎韞中將軍騎氣正驍雄前鋒縱有韓
盧技指示猶居第一功東南生謹題

黃 筌

黃要叔芙蓉圖

照水枝枝蜀錦囊年年澤國為誰芳朱顏自得西

風意不管千林一夜霜

宋思陵題

黃副使富貴春圖

牡丹為富貴花王繪之往往落俗古惟蜀待詔黃
筌能工此種是畫設色布置神氣迥別至縑素碎
脫而花瓣枝葉無少損定出要叔筆也售之者云
有四幅今只得其二彼無限春風阿誰帶笑看耶
又題云疎簾古畫展春光葉葉枝枝富貴香自覺
嫩晴天氣勝千年尚襲錦江黃鴛水汪砑玉

要叔臨邊鸞葵花圖

外錄

書畫舫云黃筌寫生富艷生動曠古無對予嘗見其臨邊鸞葵花一幅花心數蜂如活

畫鑒云唐人花鳥邊鸞最為馳譽大抵精於設色穠艷如生其他畫者雖多具有得失歷五代而得黃筌資集諸家之善山水師李昇鶴師薛稷龍水師孫位至於花竹翎毛超出衆史筌之畫可齊名者惟江南徐熙志趣高尚畫草木蟲魚妙奪造化非世之畫工所可及也熙畫花落墨頗重中略

施丹粉生意勃然黃之子居實居家熙之孫崇嗣
崇矩各得家學熙之下有唐希雅亦佳多作顫筆
棘針是效其主李重光書法後有長沙易元吉作
花果禽畜尤長於獐猿多游山林窺猿狖禽鳥之
樂圖其天趣若趙昌惟以傅染為工求其骨法氣
韻稍劣也又如滕昌祐丘餘慶葛守昌崔白艾宣
丁貺之徒皆得其緒餘以成一家要之花鳥一科
唐之邊鸞宋之徐黃為古今規式所謂前無古人

後無來者是也

米氏畫史云蔣長源以二十千置黃筌畫狸貓顫
勃荷甚工

又云蘇子美藏黃筌鵲鵲圖只蘇州有三十本更
無少異今院中作屏風畫用筌格稍舊退出却無
處可辨

黃待詔獨釣圖

外錄

書畫舫云雲烟過眼錄載黃筌獨釣圖山峰刻峭
前元時在張受益處筌山水師鄭虔知名孟蜀間
真良史也同時偽翰林學士歐陽炯嘗撰蜀八卦
殿壁畫奇異記見之益州名畫錄蓋邊鸞之後一
人而已

黃要叔龍圖

外錄

東坡與錢濟明書云家有黃筌畫龍拔起兩山間

陰威凜然舊作郡時以祈雨有應今夕具香燈試
禱之濟明雖家居必不廢閔雨意可來燔一炷香
否

畫評云黃筌畫古木信筆塗抹畫竹如斬釘截鐵
至京見二幅信天下奇筆也

書畫舫云黃筌善為沒骨畫凡花果多不落墨惟
用五彩布成其花色如初開極有生意信妙絕也
噫亦奇矣

釋貫休

釋貫休應真高僧像卷

不由文字見真機直指人心意亦微多少老人迷
未悟西來何事又西歸 達磨

擇火拈香還作麼道場原在一身中人間萬事休
過分步步相隨是此公 誌公

化成殿裏赴齋時自是神交匪夙期無量劫來揚
化了南歸一笑已先知 言法華

布囊破席任吾真臥雪當街待個人爭奈時人多
不識百千彌勒此分身 長汀老子

飯牀踢倒儘由渠佛法何分細與麤臨濟將來木
直徹全身脫去也如無 普化禪師

東家人死西家哀世上何人識破來只為豐干太
饒舌至今巖罅不曾開 寒山拾得

拄杖請師權放却外通消息不須猜

闕

知識破長

沙悟三聖將何抵對來 善導和尚

翻身躍入毒龍湫嚇得慈明半死休直待他年六月下西歸一笑不回頭 泉大道

杖藜至處自悠然手托猪頭不是顛成佛若還因喫菜世間驢馬也升天 金華使者

鰕蜆充饑困即眠長披一衲過炎天人問西來祖師意酒臺盤在廟神前 鰕子和尚

歲癸卯長至後八日山陰王英孫贊

此卷相傳為十六羅漢及觀題偈皆初祖以後應

真高僧作者豈深於禪宗不屑果位者耶畫法亦
非伯時以後有也貫休之徒方能為之董其昌題
面目手腕描法如春蠶吐絲衣摺用玉筋篆也王
子才亦參禪有得者 梵隆十散聖衣紋用水荇
描法氣韻古澹余最喜其頌金華聖者云李日華
又跋

此卷余得之梁溪華氏丁巳花朝董太史玄宰過
余墨花閣題之後君實翁兩跋焉因攷英孫字子

才號修竹宋季人所藏有雪竇和尚卷云有無盡
是兩頭語諸祖因不立言詮末代兒孫立戶牖一
花五葉失真傳又永嘉雖問曹溪路畢竟惟聞自
已禪根器警拔誠難遇鑿透高原始及泉觀此則
應真諸贊深有得乎雪竇者矣余更有對月了殘
經為姜氏德隱真筆其古朴遜前卷然不類世間
所傳也砢玉識

貫休十六羅漢像并題卷

信州懷玉山十六羅漢廣明初于登高安和送十身西
岳貫休作以乾寧初冬孟十三日于江寧再續前十本
相去已十六年叩肯景昭禪人自以來請見當年將歸
懷玉

外錄

書畫舫云寒山寺僧世傳釋貫休大阿羅漢一卷
原係賈師憲故物筆蹟狂逸樹石幽奇前有明昌
題識後有喬氏印記周公謹鮮于伯幾題名左方

連亞棲草書贊文一篇則後人配上者非其故也
偽翰林學士歐陽炯有禪月大師應夢羅漢歌見
益州名畫錄

東坡集與大覺禪師璉公書云人至辱書伏承法
候安裕傾向傾向昨奉聞欲捨禪月羅漢非有他
也先君愛此畫私心以為捨施莫如捨所甚愛而
先君所與厚善者莫如公又此畫頗似靈異累有
所覺於夢寐不欲盡談嫌涉怪爾以此益不欲與

俗家收藏意只如此而來書乃見疑欲換金水羅
漢開書不覺失笑近世士風薄惡動有可疑不謂
世外之人猶復爾也請勿復談此某比乏人可令
齋去兵卒之類又不足分付告吾師差一緊幹小
師齋籠仗來迎取并古佛一軸亦同捨也錢塘景
物樂之忘歸舍弟今自陳州得替當受東南幕官
冬初恐到此亦未甚的詩筆計益老健或借得數
首一觀良幸到此亦有拙惡百十首閒暇當錄寄

也

南唐

李煜

李後主江山撫勝圖卷

外錄

書畫舫云范菴李貞伯舊藏南唐李後主江山撫勝圖水墨短卷筆趣深長蘭坡趙都承故物也丑按後主畫宣和祕殿收九本有雜蹟而無山水故

作譜者僅列之花鳥門亦何異井蛙之論歟後主
又有竹梢寒禽圖

襄陽畫學云錦峰白蓮居士又稱鍾峰隱者皆李
重光畫自題號意是鍾山隱居耳每自畫必題曰
鍾隱筆上著內殿圖書之印及押用內合同集賢
院墨印有此印者是典於文房物也內合同乃其
璽唐室皆用內合同為御印至梁高祖始用御前
之印也錢氏以內院倣之封函曰制姓名內曰制

公某人可某官官上用此印日月用國印

又云李主山水唐希雅黃筌之倫翎毛小筆人收甚衆好事家必五七本不足深論

畫史云王敏甫收李重光四時紙上橫卷花一軸每時則自寫論物更謝之意文一篇畫一幅字亦少時作花清麗可愛

圖畫見聞志云李後主才高識博雅尚圖書蓄聚既豐尤精賞鑒至今內府圖軸登人家所得書畫

多有印篆曰內殿圖書內合同印建業文房之寶

內司文印集賢殿書院印集賢院御書印

此印多用墨

或親題畫人姓名或有押字或為歌詩雜言又有

織成大回鸞雲鶴練雀錦標飾今綾錦院倣此織

作題頭多用織成絲帶簽貼多用黃經紙背後多

書裝褙人姓名及所較品第又有澄心堂紙以供

名人書畫

李後主墨竹

外錄

都玄敬文跋云昔之畫墨竹者稱蘇學士文湖州
二公之筆可謂妙矣予猶恨其形似之拘也此幅
予家舊物驟而閱之但見其老幹霜皮烟梢露葉
而離披偃蹇若古木然諦玩久之始知其為竹也
世之評畫者謂後主墨竹清爽不凡別為一格殆
得之矣

南唐人合卷

李後主與周待詔合作重屏圖

外錄

書畫舫云重屏圖舊藏汝陰王明清家圖中正坐

者為南唐李中主也此圖與周文矩同作

中主名景後主

父也

書畫彙考卷四十